



22.6523
0032.073
:15



Kodak Color Control Patches

亳州卷十八

封授正二品花翎四品銜升缺用亳州知州

藝文集 賦

臨渦賦 建安八年至譙余弟兄從上拜墳墓遂乘馬游觀經東國遵渦水相羊乎樹下駐馬書鞭作臨渦之賦

魏文帝

蔭高樹兮曲渦微風起兮水增波魚頡頏兮鳥透迤雌雄鳴兮聲相和芹藻生兮散豆柯春水繁兮發丹華

朝獻太清宮賦

唐杜甫

冬十有一月天子既納處士之議承漢繼周革弊用古勒崇揚休明年孟詵將據大禮以相籍越彛倫而莫儔歷良辰而

戒吉分祀事而孔修營室王夫宗廟乘輿備夫冕裘甲子王
以昧爽春寒薄而清浮虛閭闔逗蚩尤張猛馬出騰虬捎熒
惑墮旄頭風伯扶道雷公挾輶通天臺之雙闕警溟漲之十
洲浩劫礪砢萬仙颺颺歛臻於長樂之舍鬼入於崑崙之邱
太一奉引庖犧左右堯步舜趨禹馳湯驟鬱闕宮之律峯折
元氣以經構斷紫雲而竦牆撫流沙而承雷紛墮珠而陷碧
燿音酷波錦而浪繡森青冥而欲雨艷光炯而初晝於是翠甃
俄的藻籍舒就祝融擲火以焚香溪女奉盤而盥漱羣有司
之望幸辦名物之難究瓊漿自闕於粢盛羽客先來於介胄
樂聖祖之儲祉敬雲孫而及此詔軒轅使合符敕王喬以視

履積昭感於嗣續裴正辭於祝史若肝鬻而有憑肅風颺而
乍起揚流蘇於浮柱金英霏而披靡擬雜珮於曾巔芝蓋歌
以颯纒中縱縱以回復外蕭蕭而未已上穆然注道爲身覺
天傾耳陳僭號於五代復戰國於千祀曰嗚呼昔蒼生纏孟
德之禍爲仲達所愚鑿齒其俗窳窳其孤赤烏高飛不肯止
其屋黃龍哮吼不肯負其圖伊神器臬兀而小人的喻歷紀
大破荆痍未蘇尙攫拿於吳蜀又顛蹶於羯口縱羣雄之發
憤誰一統於亨衢在指跋與宇文豈風塵之不殊比聰鹿及
堅特渾纒豹而齊驅愁陰鬼嘯落日梟呼各擁兵甲俱稱國
都且耕且戰何有何無惟累聖之徽典恭淑慎以允緝茲火

土之相生非符讖之備及煬帝終暴叔寶初襲編簡尙新義
旗爰入旣清國難方覩家給竊以爲數子自誣敢貞乎五行
攸執而觀者潛晤或喜至於泣鱗介以之鳴虛昆蚊以之振
蟄感而遂通罔不具集伉神光而紺闡羅詭異以戢翳地軸
傾而融曳洞宮儼以嶷岌九天之雲下垂四海之水皆立鳳
鳥威遲而不去鯨魚屈矯以相吸掃太始之含靈卷殊形而
可挹則有虹蜺爲鈎帶者入自於東揭莽蒼履崆峒素髮漠
漠至精濃濃條弛張於巨細覬披寫於心胸蓋修竿無隙而
仄席已容裂手中之黑簿睨堂下之金鍾得非擬斯人於壽
域明返樸於元蹤忽翳日而翻萬象卻浮雲而留六龍咸讐

跖而壯茲應終蒼黃而昧所從上猶色若不足處之彌恭天
師張道陵等泊左元君者前千二百官吏謁而進曰今王巨
唐帝之苗裔坤之紀綱上配君服宮尊臣商起數得統特立
中央且大樂在懸黃鐘冠八音之首太昊斯啟青陸獻千春
之祥曠哉勤力耳目宜乎大帶斧裳故風后孔甲充其佐山
神岐伯翼其旁至於易制取法足以朝登五帝夕宿三皇信
周武之多幸存漢祖之自強且近朝之濫吹仍改卜乎祠堂
初降素車終勤恤其後有客白馬固漂淪不忘伊庶人得議
實邦家之光臣道陵等本之於青簡探之於縹囊列聖有差
夫子聞斯於老氏好問自久宰我同科於季康敢撥亂反正

乃此其所長萬禪開八駿回旗掩月車奮雷騫七曜燭九垓
能事穎脫清光大來或曰今太平之人莫不優游以自得况
是蹴魏踏晉批周扶隋之後與夫更始者哉

孤雁賦

孤雁感物也過水上有孤雁隨人家畜鷺鷥輩以取食人或逐之輒飛去入左右洲渚間然終不遠去也

予遊城西自野人指示予心惻然傷因作是賦

明薛蕙

遵長河之峻阪出城隅以西徂望鴻雁於河涘之徬徨而獨
居容貌憊以愁頰音悽愴而號呼伊斯鳥之嘉淑產異質於
幽荒體貞信之至性動靜一其有常固羽族之殊特衆鳥孰
可與比伉故其行不失時止必擇所候暖北逝先寒南下既
冒險而涉危曾不恤夫勤苦惟眾鳥之多智曰庇生之得宜

弗一邁於艱難羨暇豫之無期或巢山巔或游海涯奮首虹
霓濯翼天池託戶牖之巍巍下民莫得以或窺足無虛跼翼
不勤飛資飲啄於尋丈遷徙弗踰乎旬時何斯鳥之劬勞增
荼毒其曷已將材質之不倫固天命之難俟瞻北都與南國
念室家之靡止道路實以遼遠間一歲而萬里復有羣侶中
迷雄雌死別目駭魂驚飛沉隔絕始迴遑而不進終躊躇以
永訣邇迺背雲路下緒風依沮洳潛蒙茸捐燕越之故思甘
愁苦而終窮雖六翮之尙在欲北歸其焉從於是淪形晦跡
亡精矢志牢落遠遷躑躅無寄痛衆離之一隔慕同類之難
值伺晨鳧而朝征逐駕口以宵寐豈卑湫之敢辭恥衆目之

猜忌聲未鳴而先絕翅將舉而復墜呻吟幽僻周旋林壑踐
曠野之嚴霜食潢汙之流萍延性命以苟存非初心之所營
遭志意之摧毀中無故而或驚况畏悸之叢至迫末路之惇
惇遛繒繳而往來困鷹隼之縱橫思逸樂之無遺憂慄紛其
相嬰若乃陽律畢謝陰氣時作天晴日迥草枯木落明月出
兮皎皎野露皓以漠漠戀南游於朱厓懷北棲乎玄朔魂魄
竦而怵惕顧形影之寂寞吐哀響之嘹唳志激昂而將躍動
幽谷之虛籟停高門之曉析聞之者怛悵而自憐見之者歔
歔而不樂嗟斯禽之可哀像羈旅而無朋因昆蟲之同感未
若斯人之有情汎游觀而歷茲忽容與而不行詠鴻雁於周

詩泣涕下而沾纓覽萬物之叅錯悟大化之合併相吉凶與
憂喜終同歸於杳冥齊百慮於一致孰云天道之不平



詩

贈白馬王彪彪字朱虎植之弟

魏曹植

謁帝承明廬逝將歸舊疆清晨發皇邑日夕過首陽伊洛廣
 且深欲濟川無梁汎舟越洪濤怨彼東路長顧瞻戀城闕引
 領情內傷其大谷何寥廓山樹鬱蒼蒼霖雨泥我塗流潦浩
 縱橫中逵絕無軌改轍登高岡修阪造雲日我馬元以黃其
 元黃猶能進我思鬱以紆鬱紆將何念親愛在離居本圖相
 與偕中更不克俱鴟梟鳴衡扼豺狼當路衢蒼蠅間白黑讒
 巧令親疎欲還絕無蹊攬轡止踟躕其踟躕亦何留相思無
 終極秋風發微涼寒蟬鳴我側原野何蕭條白日忽西匿歸

鳥赴喬林翩翩厲羽翼孤獸走索羣銜草不違食感物傷我
懷撫心長太息其太息將何爲天命與我違奈何念同生一
往形不歸孤魂翔故域靈柩寄京師存者忽復過亡沒身自
衰人生處一世去若朝露晞年在桑榆間影響不能追自顧
非金石咄咄令心悲其心悲動我神棄置莫復陳丈夫志四
海萬里猶比鄰恩愛苟不虧在遠分日親何必同衾幃然後
展殷勤憂思我疾疢無乃兒女仁倉卒骨肉情能不懷苦辛
其苦辛何慮思天命信可疑虛無求列仙松子久吾欺變故
在須臾百年誰能持離別永無會執手將何時王其變玉體
俱享黃髮期收淚卽長路援筆從此辭其

思友人詩

晉曹攄

密雲翳陽景霖潦浩庭除嚴霜彫翠草寒風振纖枯凜凜天
氣清落落卉木疎感時歌蟋蟀思賢詠白駒情隨元陰滯心
與迴飈俱思心何所懷懷我歐陽子精義測神奧清機發妙
理自我別旬朔微言絕于耳蹇裳不足難清陽未可俟延首
出階檐佇立增想似

耆老歌并序

祖述爲豫州刺史斬張平敗樊雅遂克譙城黃
河以南悉爲晉土百姓感悅嘗置酒大會耆老

曹攄

幸哉遺黎免俘虜三辰旣朗遇慈父元酒忘勞甘瓠脯何以
咏恩歌且舞

木蘭辭

北魏 古樂府

唧唧復唧唧木蘭當戶織不聞機杼聲唯聞女太息問女何
所思問女何所憶女亦無所思女亦無所憶昨夜見軍帖可
汗大點兵軍書十二卷卷卷有爺名阿爺無大兒木蘭無長
兄願爲市鞍馬從此替爺征東市買駿馬西市買鞍韉南市
買轡頭北市買長鞭旦辭爺娘去暮宿黃河邊不聞爺娘喚
女聲但聞黃河流水鳴濺濺旦辭黃河去暮至黑山頭不聞
爺娘喚女聲但見燕山胡騎嗚啾啾萬里赴戎機關山度若
飛朔氣傳金柝寒光照鐵衣將軍百戰死壯士十年歸歸來
見天子天子坐明堂策勲十二轉賞賜百千強可汗問所欲

木蘭不用尙書郎願馳千里足送兒還故鄉爺娘聞女來出
郭相扶將阿妹聞姊來當戶理紅粧小弟聞姊來磨刀霍霍
向豬羊開我東閣門坐我西間床脫我戰時袍着我舊時裳
當窗理雲鬢挂鏡貼花黃出門看火伴火伴皆驚惶同行十
二年不知木蘭是女郎雄兔脚撲搗雌兔眼迷離兩兔傍地
走安能辨我是雄雌

答譙王詩

隋 于仲文

梧桐開廣苑竹苑列羣賢景差方入楚樂毅始遊燕折角揮
談柄重席吐言泉武騎初擒翰文學正題鞭玉徽調綠綺壁
散沉青田晚霞淡遠岫落景藻長川未陪東閣賞獨咏西園

篇

送裴大夫赴亳州

唐姚合

杭人遮道路垂泣浙江前
譙國迎舟艦行歌汴水邊
周旋君量遠交代我才偏
寒日嚴旌戟晴風出管弦
一栢誠淡薄四坐願留連
異政承殊澤應為天下先

望渦流辭

渦之水西流過譙郡北乃稍南又東流入於淮包
二水皆經其南以東歲旱深不五尺秋雨集始
大而城之東北惟渦曲水深黑灌水
蔚然舊有祠曰龍嘗宅焉作望渦流

宋晁无咎

望渦流兮浼浼勢南折兮東還
水衝隈兮岸圯嗟龍去兮幾年
俛余進兮蔡祠儼帝服兮神冠
牆壁績兮怪奇泯虵穴兮蝸盤
列缺鞭兮雷駟衛雨縵兮驂鱣
老龜起兮霧游跂瑋瑁

兮鼈鼉或若馬兮非人紛陪後兮
導前木陰陰兮藻長蝌蚪舞兮下
顛僚羣出兮旅嬉忽俱去兮不還
意土國兮無龍恐逃桷兮藏櫪帝
有命兮時桀亦隱隱兮填填世鑠
石兮流金將誰職兮此愆包之水
可揭也渙之水可厲也前汝足其暨
也後汝跼其躓也江有鯢兮橫淵海
有鯤兮翔天汝隘此兮往爭滔淫水
兮八埏重日望其厓若有宅於隈不
汝爭於厓汝安其隈澤不必施也

包渙二水與渦並流

木蘭歌

補唐韋元甫

木蘭抱杼嗟借問復為誰
欲聞所憾憾感激疆其顏
老父隸兵籍氣力日衰耗
豈足萬里行有子復尙少
胡沙沒馬足朔

風裂人膚老父舊羸病何以疆自扶木蘭代父去秣馬備戎
行易却統綺裳洗却鉛粉妝馳馬赴軍幙慷慨攜干將朝屯
雪山下暮宿青海傍夜襲燕支虜更攜于闐羌將軍得勝歸
士卒還故鄉父母見木蘭喜極成悲傷木蘭能承父母顏卻
卸巾幘理絲簧昔爲烈士雄今爲一作復嬌子容親戚持酒賀
父母始知生女與男同門前舊軍都十年共崎嶇本結弟兄
交死戰誓不渝今者見木蘭言聲雖是顏貌殊愕驚不敢前
歎息徒嘻吁世有臣子心能如木蘭節忠孝兩不渝千古之
名焉可滅

送姚處士歸亳州

補劉得仁

白髮麻衣破還譙別弟迴首垂聽樂淚花落待歌杯石路尋
芝熟柴門有鹿來明王下徵詔應就瑁峯開

送王道粹知亳州

宋梅聖俞

古者二千石高車駕青驪車前陳曲蓋車後建朱旗金鼓鳴
兩旁壺漿擁通達所俯重威惠所仰撫懷葵景毫實鉅屏往
俾國相之國相稱疾還正值民阻饑朝廷急恤養選守莫與
宜君嘗典海陵政蹟爲眾推令授輒辭命大夫多飛綏屢上
不得請飭馭俄輕齋旣體堯舜仁又答稷契知八月風漸漸
高木葉披披郊原棗已剝場圃黍可治必期寬賦斂無乃息
羸疲何當過苦縣肯暇觀舊碑

送李奉議亳州判官

陳師道

邢氏號外府藏室多異書自公有餘力一覽意何如爲學將
日益受益不受誣正須高著眼濠梁有遊魚

出城赴太清宮遊馬上口占

歐陽修

擁旆西城一據鞍耕夫初試勸農官鷓鴣日出林光動野潤
風搖麥浪寒漸暖綠楊纔弄色得晴丹杏不勝繁牛羊鷄犬
田家樂終日思歸盍掛冠

過河龍潭

歐陽修

碧潭風定影涵虛神物中藏岸不枯
夜四郊春雨足卻來閑
臥養明珠

送李密赴亳州

蘇軾

倦輸關內粟遂請潁州符治績可稱最士民將以蘇譙郡君
命重苦縣祖風殊仙檜留陰在甘棠印花敷行舟通遠水候
騎溢長衢化日人懷望煙雲自滿湖

過口

梅堯臣

秋水見灘底淺沙露浪痕白魚跳處急紅葉落時昏帶月溯
渦尾落帆防石根清淮自行盡明日又前村

老子祠

明劉昌蘇州人

乘牛西去不堪招遺宅荒涼在近郊臥地有碑牛礪角傍牆
無樹鶴移巢雲開廢井丹光出月映重關紫氣交卻有道人

傳舊法夜深朝禮奏仙匏

曹 璉

一托仙胎八十秋生來已自雪盈頭泉枯龍井人何在火盡
丹爐檜尚留朝帝漫傳因白虎度關誰復見青牛惟存道德
五千語我欲重將細校讎

楊 翱 樂安人

地入荒涼碧草萋瀨鄉仙跡望中迷碑橫古砌雲長瑣花落
空林鳥自啼尚有丹爐藏草露府志作歌檜柏空留樓閣照虹霓一
官賸得遺跡在多少遊人爲品題

老君石像

宋德方

玉厯垂文像外傳清光下徹九重淵安排日月歸元造把握
乾坤入自然白鹿東昇小有洞青牛西度大羅天狂辭欲讚
元元德何異秋蛟吸百川

姬 翼

浩蕩神光徹大虛主張高厚定元初大包宇宙極無外細入
毫茫光有餘萬象斡旋通造化羣生出沒賴吹噓物情不許
通消息動植飛潛各自如

登東臺西樓二首

按舊志此詩皆作登西臺府志作登東臺西樓另有東臺西臺二首今從府志正之

傅希說

野寺紅塵淨閒門掩碧苔偶尋青草徑深入白雲隈敗葉驚

風戰寒花冒雨開人生須作樂逝歲苦相催

有客來京邸同吾上古臺水分平野斷雲盡遠天開滿目秋
光老疎林鳥韻哀相逢拚一醉何必問蓬萊

東臺

傅希說

西風吹我上東臺景色淒涼愴客懷葉脫舊枝隨水去雁排
新陣拂雲來老僧煮茗添新火行者焚香撥舊灰坐久神清
吟興發聊將短句漫敲裁

西臺

傅希說

肩輿扶上西臺寺風景依稀似月河無數好花開錦繡成羣
幽鳥弄絃歌雲封方丈僧歸晚水接長淮客過多一段好懷

無著處新詩改罷漫吟哦

亭都行

王廷相

桐宮桑林古帝都千年跡滅石空在龍山連陵如朶雲無涯
渦水東流海明皇朝元殿魏武省稼臺蟠螭剝白石古棘崩
蒼厓雄豪已逐暮雲散精靈時向空林哀燦燦瑶花苑紺殿
伯陽宮古木蔽日月萬瓦催魚龍黃鶴秋嘹唳丹井水崢嶸
猶龍恍惚度沙海惟有藥草年年生城中遠延三萬戶中有
豪家多官府賓客懶作遊冶盤翠幕層樓對花樹桃花飛入
窺洞房洞房七十紫鴛鴦花聚仙人散風雨迴笙合瑟春迷
茫簾底芙蓉兒不知上客尊臨池織手雪藕絲金盤相勸故

意勤滴露金叵羅停雲玉樹歌楊花飛蕩煙相和黃鸝紫燕
春心多元晏先生鶴擎衣閉門三月學著龜有書不敢獻天
子擊劍徒爾心神飛帝德碓圖流水去五嶽勲名在何處若
使豪華鎮相守季倫不滅平原壽悵望青牛紫氣紛河上公
兮同出秦遨遊元圃三千闕藉手雲霞謝世人

送薛君采還亳

王廷相

渦上逸人蓬島客十年不見心相憶忽來彈我邱中琴坐對
風雷起秋夕手弄圃風凌海波仙人還唱昇天歌赤霄元圃
杳然去瑤草金芝奈爾何

約遊薛考功南園詩

顏木

暑氣林薄微市囂村野驅習靜性自澹游行古所娛茲村美
嘉木房楹亦攸芋巖雀蔭高篠澤鴻還故區漠漠冰洞霧隱
隱雲樹株綵蠲始睇浦朱華亦蒙渠中有偃虬曲堪成達士
居綢繆余昔眷登眺君早如矧伊陰雨霽茲應景物殊與爾
共杯酒飄然謝車徒

常樂園二首

其一從府志補入

蘇祐

總轡歷淮服弭節薄譙城怡然覲時哲慰茲良覲情招要遊
中園心目豁餘清叢篔麗陰輝朱明散炎蒸摘蔬止近畦樹
槿已盈庭好鳥鳴音和芳醴心相傾吐論多微詞潔已寡俗
營顧余淹行役撫志慚達生

亭州志 卷一
脩脩張仲蔚穆穆謝康樂屏跡深蓬蒿養疴茹蕭藿襟抱無
煩促天地同廓落羽翮鍛鶴鸞屈曲委龍蠖清芬挹芙蓉翠
藹映蘭薄明龔老氏常靜尋顏子樂賁玩邱園交細豈農圃
託卷舒惟權度俯仰遂寥濶

常樂園二首

馬公卿

主人愛清曠負郭起園廬杪秋宿雨霽訪隱入郊墟古木翳
町曠蕭蕭野人居柏徑轉幽窈竹林映扶疎輕霜落羣丹獨
有黃花舒鳥馴下閒庭魚樂游深渠引滿酌村醪呼童摘青
蔬登堂考鐘鼓入室玩琴書游賞雖寄情雅意在元虛采眞
未遺俗取適不求餘尋樂君希顏矧非我愧遽逸駕不可攀

頗與功名疏故山荒樂園行當賦歸與

芳園托幽棲一徑入蒼莽數椽結衡茅取適謝高廣碧草滋
堦除竹樹列森爽籬落花枝翻蛙壠藥苗長主人箕穎傳當
路稅塵鞅豈惟避煩囂習靜抱深養道存天地先意寄羲皇
上有時情景會翛然獨來往精舍卽祇林蓬瀛漫遐想慚予
苦行役公暇一趨訪問道啟盲聾所見浮素仰載酒園中遊
兼得寓清賞

題薛君采瑩心亭

喬宇

瑩心復瑩心愛此一湖水心原本瑩然安藉淪寒泚維阜肇
生人一心涵萬理玉潔蘊其眞鑑空差足擬云胡物欲萌所

習相近矣正如清冷淵渾濁良有以哲人燭府志作觸性初澡雪
未但已虛靈無蔽蒙方寸空明裏存存日端澄何物得爲滓
祛塵時濯纓避囂或洗耳庶幾明德心可以見道體古學慨
榛蕪頽風競浮靡關洛諸先哲教人先敬止本原果能澈自
底充實美偉哉瑩心功大業胥此始我來憇亭中惕然發清
思

訪薛君采一首

吳檄

清時薛羅子岩居常閉門著書多暇日種竹已成園我繫燕
山馬同開栗里樽不辭秋色暮對語接高論侵晨灌芳圃汲
水北河濱種藥秋已熟何愁多病身山亭下雲氣觴詠陶心

神灑翰頻見遺清風滌凡塵

夜泊渦河龍潭

吳檄

輕舟弄素月靜夜橫清渦天風毛髮亂疎星燦明河圖經託
父老冥漠年歲多淵沉三千丈湛瑤寒無波微流帶文藻絕
岸無柔莎炯如帝鴻鏡可鑑不可磨中蟠至神物役使羣蛟
鼉蛇蜒頭角古勁鬣誰敢劇深宮照珠貝頗費蚌與螺何時
葛陂竹化作陶公梭

送薛西原吏部歸亳州二首

崑顧夢圭 武祥

終風號朔野元陰凝高邱六龍未迴馭寒氣凌重裘豈無射
獵心灌莽森相樛君子理舟楫眷言思遠遊南中孤巘秀黃

亳州志 卷之六 十四
河受羣流登樓感崇替俯眺二百州究彼南華旨淪霞以忘憂

高岸爲深谷溟渤成桑田貞一豈足恃疇昔共知然漢宮有佳人媵服何娟娟榮耀備諸好嬪御失其妍抱景向絕域沉思托幽絃珪璋在中曲宮羽流千年白日豈不光幸哉照虞淵

謙薛吏部園居

顧夢圭

秋城息征驂言訪高人宅密篠紫葯房寒甃映雲石對牖叢藥馨循除曲泉碧坐觀日月遙匪抱烟霞癖幸茲接清顏遐想慰疇昔冲懷敞延納妙論酬討索羽觴續蘭膏縹帙展瑤

席謬加徐孺禮深愧孔融客象外不可窮道德領元籍青牛凌紫氛俗駕將安適

過薛吏部園亭談禪

曹嘉

地抱煙霞勝亭分水竹清禪因靜裏悟學向晚來精野服輕朝列村居遠世情追隨頻有覺又欲即無生

送薛吏部謝病歸亭

郭維藩

謝病譙城去移家畫省違望隨雲共遠心與鳥同飛江海名難得風塵爾獨歸星園堪習靜到日掩郊扉

過城西清河飲

舊志作過西城野照原集改正

薛蕙州人

初服性已曠久痾忘仍疲豈謂傷淫滯偶以戀棲遲聿來年

歲遷驟看節物移晴陽改陰候暖律變暄吹晨發高闐曲夕
驚清川湄白雲生幽泚綠水激層涯外感耳目超內尋神蘊
披泛濫滄洲趣彷彿崑山姿揆已信薄劣遭時易磷細來復
雖不遠往蹇豈能追孟嘗終何迫罷歸聊所宜願言在弗諉
援毫申此辭

小園舊名退樂馬敬臣中丞改曰常樂因爲題榜兼賦古詩
二章見贈敬次韻奉酬且記吾園得名之始 薛 蕙

西原無舊業南郭得新廬開荒築場圃改徑通村墟達人賞
我趣遠訪林間居年德非可親氣味畧未疎傾盖語移日縱
談懷抱舒置酒瑩心亭促席臨清渠燃竹煮山茗炊黍薦園

蔬贈詩借高論題榜忝名書雖榮華袞袞自顧實空虛平生
志尋樂憂患每有餘好學謝希顏寡過願師蘧守節欽兩龔
知止企二疏微公蘊眞鑒晤語誰與

荒園負城郭窮巷翳榛莽誰云一區小我懷殊自廣結茅尚
素樸種竹愛蕭爽樂此林廬就忘彼年歲長自予釋纓紱一
紀脫羈鞅獨學歎孤陋成性愧存養稍知天路近欲陟未能
上希音寡偶和好事莫來往遂輟邱中琴千載寄遐想晚遇
林慮公折節猥相訪望洋增大觀披雲快高仰諒非溫伯子
何以疇心賞

自西野循渦曲臨眺贈同遊

薛 蕙

養拙非藏器寢疴豈逃名進慚冠蓋羣退慕邱園耕多病齒
 髮暮屏居懷抱盈稍尋臯壤樂暫慰蹉跎情入野緬曲折臨
 漢屢迴縈霜濃石道淨水斂雲潭清烟景淡將夕汀洲遞微
 明疎蕪岸篠落寥戾川禽鳴心賞夙所重身累適已輕豈辭
 疲曳倦幸與良遊并濟時謝明哲量已保幽貞願從求羊輩
 放曠終吾生

答顏使君

薛蕙

俗紛倦城肆放蕩懷林莽命賞來芳訊探奇協幽想蕭條南
 苑際中夏猶淒爽雨霽綠泉生風驚白雲上禽魚行盼睠水
 木坐俯仰梁棟下陰霏房櫳遞哀響淪飄病轉劇偃蹇年日

長名山仍未去末路亦何往故人念相慰賤子擬自廣
 且登臨願言操几杖

譙城清隱卷為陽鍾賢題

薛蕙

譙城有高士性尚異凡傳逍遙卧林壑偃蹇輕王侯春原時
 雨過老圃荒泉流朝觀南岡稼夜榜東谿舟馴鶴對鳴琴閒
 鷗見垂鈎人間事方多去去從君遊

希夷先生墨竹歌并序

蕙家藏希夷先生墨竹之右先生大
 書絕句云莫貪枝葉亦成龍要悟從

頭到底空已遇神仙施筆力風霜不可裁磨礪後題云陳圖
 南作就賦畫之左有章次道魏仲先二絕句魏并有其畧
 言錢公淡成入華山參先生作此贈之蕙自少時即聞之長
 老云昔野人掘地得石函中得此畫而周揮使廣取之蓋宣
 德正統間也其後史揮使獻得於廣子文而方揮使為復得
 於瓏子經嘉靖丁酉蕙乃得於煇孫顯宗蕙觀先生詩窮理

入微蓋非後世詩人所能言而其字體雄偉不凡兼有古人之法度亦非近代書家之比也鄉使得于外郡莫詳所自則其真贗亦不能明幸自吾鄉為數故家所傳事跡彰著眾人皆能言之其為先生真跡可信無疑然數故家皆武人莫知先生為何如人雖頗愛重此畫而不知其為希世之寶也又幸亭地不當要衝故此畫得為吾鄉舊物歷百有餘年而蕙得之不然已為有力者取之他矣蕙嘗讀邵子擊壤集有觀先生真及墨跡三絕句云未見希夷真未見希夷跡徒聞希夷名希夷心未識既見希夷跡復見希夷真始知今與古天下常有人希夷真可觀希夷墨可傳希夷心一片不可得而言於戲後世不惟不知先生顧其知哉有能真知其說然謂不可得而言者此豈世俗之所能知哉有能真知其說然後知先生之道超然天地之始彼神仙云者其殆強為之名乎抑先生之詩固以一切皆空豈獨有所謂神仙耶邵子之意亦若是也雖然世無邵子孰不以斯言為孟浪之言夫嘉靖庚子歲秋七月大寧居士薛蕙識

水墨淋漓數莖竹琅玕不羨多成束飛白玲瓏一片石夜光休誇大盈尺云何此畫價無敵迺是希夷之真跡列仙籍中

多品流先生况是神仙伯宣靖仙材亦不羣尋師遙入華山雲解頰一盼不易得敢望揮毫遺此君畫首題詩兼姓字鳳翥龍蟠三十四丁甯舉似一轉語截斷世間無限事領畧真仙上上機參同古佛空空義古來畫史雖無數爭似仙人得天趣筆勢翩翩入三昧元旨明明標一句梵經合受天人禮仙跡那無鬼神護五百年來如電過一幅霜縑完未破湍水東流鶴不歸峩眉西逝龍猶臥故鄉之子慕神仙偶收圖畫如有緣錦囊新裝綠玉軸彤管更賦青霞篇安得至寶不磨滅期與好事相流傳先生聞此應大笑水中捉月真可憐希夷先生墨竹短歌

薛蕙

大寧齋中至人竹浙浙天風撼蒼玉大書詩畫真三絕價敵
宣和六千軸伊川空有句傳神世俗寧知僞與真祗恐明珠
終暗擲此君他日與何人

九日顏子攜飲西郭

薛蕙

九日愁空臥西園喜並游閒居同粟里置酒得荊州樹擁樓
臺出雲隨鼓吹浮不辭重落帽短髮自堪羞

道院看牡丹

薛蕙

四月紅芳尙滿枝仙家春色怪來遲彩雲自解停歌扇香霧
時能墮酒卮隔檻流鶯愁並語過簾輕燕巧相窺無勞地主
留堅坐貪爲名花醉不辭

自賦常樂園

薛蕙

譙國城南稍又東一邱新買卧衰翁人非九品羲皇上園似
千花佛界中隱几自堪消永日褰裳何待御冷風文章習氣
今應盡著意題詩也未工

牡丹

薛蕙

紅紫紛紛次第稀故留國色殿春暉東皇巧思應多少西子
妖魂定是非香霧氤氳籠寶鬢流風宛轉弄仙衣白頭更覺
鍾情劇忍訴清尊不醉歸

瑩心亭觀荷花作

舊志作瑩心亭
照原集改正

薛蕙

瑩心亭上逍遙客照眼池中爛熳花白苧單衣銷暑日玉盤

纖手送朝霞身閑但覺牽詩思年老方知愛物華笑聽采蓮
頻度曲驚看垂柳乍栖鴉

龍潭

在渦河西歐陽永叔有詩

薛蕙

龍潭日落鳥飛迴上拂扁舟下釣臺尙父已無西伯載狂奴
翻使漢庭猜江湖萬里人空老宇宙千年鳳不來忽被漁翁
笑相問棹歌何事亦悲哀

春日同王劉二少府楊上舍讌薛園

李先芳

久客歎迷津寒帷及早春還携好酒伴來覓賞心人曲奏梅
花落樽開竹葉新不應五斗粟留滯百年身

七夕共呂王二子飲薛園

李先芳

吏事何其迫秋風稍可人城南一散眺花下幾閒身客帶烟
霞色天開牛女辰迢迢銀漢上何處是通津

同郡伯孫對溪薛園賞牡丹

李先芳

千騎下東方名園勝洛陽使君停虎竹詞客賦羔羊春興濃
於酒花封巧作玉尊前逢李白葉底醉姚黃日氣團朝露霞
標逗晚粧色能將國重天自爲人芳羯鼓催何急雕欄樂未
央乍看應奪日久坐不聞香佳讌開金谷才人出洞房睠茲
明媚景宛似少年場寄語閒蜂蝶同來入醉鄉

看花臺

李先芳

浮雲深鎖故侯家勝國樓臺返照斜閒過烏衣尋里巷到來

金谷少繁華種桃疑入元都觀行樂欣逢杜曲花芳草不知
遊子意相將秋色遍天涯

秋風臺

李先芳

漢武橫汾久陸沉昔人復此藉登臨當時歌舞行雲散此日
亭臺宿草深一曲秋風吹過雁孤城斜日度寒砧不堪白首
逢搖落愁絕黃金壯士心

輓薛考功

李先芳

孝廟中興日才人滿帝庭騷壇推薛稷鴻筆炳丹青吏部鍾
天挺中都協地靈一清傳道德三教表儀型已化丁令鶴猶
占太白星谷神元不死仙骨有餘馨林簇留題竹苔侵一草

亭風衰煙樹暝龍去水雲腥絕壁啼山鬼陰崖起夜霆捫蘿
開曲徑拜石讀殘銘孤塚嗟岑寂斯人空杳冥九原如可作
同著太元經

題薛園迷花塢

李先芳

會隨樵者入山家滿路香風散彩霞行到仙源人不見却疑
身在武陵花

來風軒

李先芳

綠樹透迤小徑斜明珠蕩漾水亭花一曲南薰清入骨紅塵
隔在嶺西霞

醉月亭

李先芳

山亭把酒月初上我醉欲眠月亦斜若道月明不中酒常懸
明鏡在天涯

聽雪齋
李先芳

爭看玉女散天花醉殺山翁白鼻騮寒色滿林聽不盡隨風
吹入郢人家

薛園臘月見梅花
李先芳

獵獵天風慘物華名園今喜見梅花還同何遜揚州興來醉
錢塘處士家

不須笛裏弄梅花起向尊前舞鏤鉞醉把疎枝問春信東風
吹不到天涯

安南思歸八律
李國士

嘉容漢封尾河洲天盡頭山通去國路雲礙望鄉樓老劍衝
星亂悲笳落日愁羈心與奔浪日夜向東流

洛國杳何許明媚又經時青鏡不相放丹砂安可期天空稀
雁字世態妬娥眉關塞千行淚無端灑路歧

一官吾自哂三歎野情違嚼蠟了無味看鷗靜息機年華烟
雨細草色鬢毛非見說嚴陵瀨容予狎釣磯

雨過池光靜誰同醉艷陽感時懷令序垂老滯殊方土俗調
鸚鵡天兵被犬羊不才餘病骨含愧坐垂堂

搔首緣何事孤懷念樂羣琴樽稽叔夜詩賦沈休文我輩歌

梁月他鄉隔暮雲黃鸝求友意不忍樹邊聞

除日那須問逃名但乞身層林還倦鳥五岳待閒人羣積詩

篇富紅酣醉態新由渠獵通顯疎懶任君真

驚濤辭宦海清夢到山家野霽耕鋤樂雲空眺望賒平安幾

个竹富貴一欄花回首張公子紅亭吸絳霞

勞生心屢折定擬賦閒居敝緼從捫虱披經學種魚村沽行

欲遍官夢向來疏休沐聊乘化沾沾意自如

過薛西原先生廢園有感

王寰洽

元亭寂寂鶯花老銷盡環堦書帶草樹繡苔光只自春玲瓏

愁聽黃鷄曉文采風流異代傳年年煙雨凝荒阡龍門酒泥

方丈濕何人下馬酌公前公今鸞鵠凌仙洲幽咽松篁奏坎

篲羽衣明月忽飄舉精魂彷彿常來遊道旁五色留瓜圃一

日池臺足千古君不見叔子當時樂峴山片語能存鄒潤甫

園與王別駕
野近相友善

同夏侍御避暑桐宮寺

王寰洽

野寺全宜暑長松落翠微溪光林外入秋意雨中飛白社能

容酒青山共息機晚涼歸小騎雲影上絺衣

過希夷先生祠

在渦水陽

王寰洽

仙伯新宮倚碧瀾偶來繫馬獨盤桓清秋遙憶三峯色白日

常流萬古寒翻手乾坤藏鳳羽廢形日月穩龍蟠白雲不盡

紅塵外慚愧鄉人老鷓冠

送薛大年令溫陵

王寰洽

幔亭仙樂遲行車帝遣雙鳧擁絳霞民力相於東野御宰官
應有葛洪砂卽看呪虎爭馴雉自供秔田不種花何處重歌
清德豈刺桐城外海山涯

喜楊巨屏判毫

王寰洽

共醉曾歌擊筑傍高風東海自泱泱那期白鳳元經就暫領
青牛紫氣鄉影國屏星初照曜故人草澤已輝光題輿莫羨
吾家事驥足天衢萬里長

張同守枉過敝園失送賦謝

王寰洽

菟裘小築傍城隈嬾性終年徑不開忽訝雙旌題鳳去偶緣
步屨聽鶯來角巾咏嘯慙無竹蠟屐經行任破苔身作二騶
猶不惡幾時車畔對啣杯

九日同葉寄生集薛公儀南園高臺十韻

王寰洽

高原縈曲薄芳節媚晴沙倚眺秋驚遠同人興轉賒干林供
秀爽萬象湛清華迴合桃源徑幽深栗里家碧雲閑戲馬紅
樹點棲鴉日淨萸囊馥風微布帽斜停觴遲過鷹藉草嗅寒
花懷古狂逾動悲歌醉不譁霜鐘聞野寺村唱出樵車月色
紛叢篠歸迷白鼻騮

題牡丹六首

絕五

王寰洽

步搖香轉細承露色逾新姚家稱帝後黃綺不為臣大黃

明光垂麗景方寸疊針奇不是因祗巧虛無織女絲錦繡

怯露痕猶重冷霞色好如天風吹不去誰為結仙裾軟銀

木葉蕭然下微增湘水波盈盈降帝子澹彩奪纖阿秋水

照眼殷含翠蘋陽未足誇猩紅猶帶俗合號赤城霞猩血

嬌枝滿未央絕艷在昭陽怪底無顏色春歸合德鄉漢宮

題牡丹譜

王實洽

阿姨粧晚試丹華綠瑣窗前日已斜小語侍兒收玉合嫣然

一笑映朱霞夕陽

紫綃御久供天機何事承陽愛著緋窈窕花宮陪輦側紅雲

飛滿六銖衣魏

殘粧淨洗別深宮都把鉛華付畫工不是焉支山下色雙垂

紅玉染東風如膏

名花此地傾城久何必曹州一點紅恰似娥眉燕趙女承恩

盡入漢家宮曹州

大方岳李老伯平蠻凱歌

王實洽

八桂霜高瘴癘無妖纏南極滿馱盧寧煩按劍君王顧赤羽

頻將上將符

橫海樓船壓海雲光搖玉練動星文龍門望合先聲起盡護

函犀浴鐵羣

椎牛饗士距騰超十萬龍驤總不驕春到百蠻回殺氣風清
五管失炎颶

千羣面縛入轅門祝網爭呼明主恩怪底龍精吟夜雨沙場
曾不試霜痕

櫓槍一夕落南荒露布平明達未央萬古麗江開錦繡清連
山色轉清涼

千家賣劍事春耕青箬蒼藤萬壑明一夜蠻煙秋雨淨蕭然
玉帳不聞聲

尉佗朝漢有荒臺楊僕戈船下瀨才公自壯猷兼數子明光
金印斗如來

不殺天威八陣橫何如方畧在金城指揮白羽須臾事圖畫

真消麟閣名

五難詩并序

王癸兩歲毫土不天先之以同祿繼之以旱蝗
終之以癘疫兵寇嗟此毫民飢魄殘息幾無孑

遺矣予高日梓里痛心疾首漫賦五
詩用備當道消弭軫恤者之一鑒

孫養粹

火

天行降燠罰祝融肆威虐日夕驚沙起怪風吹簾幙黃霧塞
四巷赤眚變城郭兒女走沸號鷄犬亦狂愕驚楚尙未定譌
火旋騰作炎炎亦赫赫烟烟復燐燐烟飛迷九市烈燄吐重
閣雕甍流金蛇華表飛紅雀枯骨葬煨煤殘魂亦消鑠井渴
不得汲研竹空就縛既熄忽復燃雷風日噴薄經旬息爨燎

亳州志 卷之八 二六
炮龍不敢灼哀哉千家燼鬼哭還如昨
兵

危城懼崩潰引領望援師士馬屯駐久牢廩費不貲艸對朝
牧馬日暮捆載歸村落剽掠盡郊關斷烟炊城內衣冠族佻
佻困莫支官長畏要挾開門恣闌居牽馬繫中堂高坐將髯
髯主人低顏色奔走施帳幃安置甫未畢盤餐敢迂遲典衣
問酒肆貼珠市甘肥亂頭羣轟飲醉扯東鄰姬冠紳爲奴隸
衿秀奉卮匱小有不獲意鞭撲交下之人生貴意氣繫辱忍
無辭反覆思寇來早是絕命時

饑

流火焦金石螟蟲食曠土四野無青草良田變斥鹵蝗口稍
餘糧勺命賚盜伍併日營一飽十餐不得五草根與糠竅強
顏充羞釜垢衣瘵面啼呼天不應苦待死不卽死骨肉化豺
虎偷兒盜主人嘲噓勸刀俎人類相殘盡性命輕鴻羽念之
摧肺肝慘慟絕今古

疫

造化有天札民生多乖沴子子兵荒遺重罹此瘡癘呻吟滿
壁隅號哭慘天帝闔室化異物舉族斬宗系尸蟲流戶外枕
籍相蒙袂衣薪葬蒿蓬委壑施犬彘蠅蚋腥道路烏鳶集埤
塊村巫日婆娑醫不擇三世謙會久斷絕弔唁互奔遞今夕

眼前人明朝聚鬼第陰風日慘淡何當迴清霽
寇

皇路際傾仄民窮盜遍起么麼黃犢兒揭竿棄耒耜狐嘯梁
陳間蠶食譙宋里兒女供刀俎室廬盡蕩燬掘地搜鼠糧焚
林攫鳥子孤城日合圍烽火照遠邇郡兵空受甲畫餅無足
恃仙仙市菜傭飢寒守窮雉流氛稍退舍殘民復營壘部方
左右迴畫地南北履赭衣入城市軍吏不敢齒非無守禦人
盜鈴自掩耳養癰有時潰未卜局終始

方岳定西歌

薛鳳翔

君不見日南交趾要荒外曾以桐標分漢界衣服雲山有異

同文身被髮風仍在卽有諸司屬長官曾無圖籍計偏安柔
遠不辭布威德負固終恃行兇殘兇殘者誰陸土日獨抗王
章不肯伏常車怒臂逞螳螂據穴建牙爲虺蝮煌煌天討大
軍行投筆能令川谷平推轂轅門須換號授綬方嶽領專征
征誅仗文武十萬親貔虎杜預表南征孫堅稱討虜何如李
牧禁中來指揮號令風雲開一檄招來歸脅從六師批擣獲
渠魁不煩轉戰旋戈戟淨掃蠻烟清絕徼露布朝飛萬里雲
天子臨軒賜顏色邊疆曾未歛呼韓連帥諸侯向賀蘭廊廟
幾時行爵賞雲臺直取畫圖看

支園牡丹歌

國朝 徐乾學

譙城連延三萬戶北枕渦流跨城父省稼臺荒倚夕陽朝眞
樓圯飛朝雨惟有巍峩元武門舟車繹絡通商賈翠幙層樓
夾道傍玉管銀箏盛歌舞支公好鶴更耽奇古寺桐宮對別
圃前庭沙棠後烏桺洛陽名花不知數河堤上已禊筵開飛
蓋千人溯澗來葡萄之盤鸚鵡杯主人揖客相徘徊都市乍
疑錦繡列神仙忽見金銀臺美人帷帳處處設對此不欲登
蓬萊美人窈窕情何極吳脂越粉粧非一神女高居宋玉愁
宓妃洛浦陳王憶謂是靈芸繡輦行試看飛燕雙車入皓腕
朱顏自不同啼眉墮髻慵無力晨從綺閣罷粧梳晚向斜陽
鬪顏色分明明月舞霓裳彷彿流黃工夜織懸知十斛須明

珠不難喚卻青驪駒橫陳錦幃鋪糴稔何似華陽作畫圖主
人向予嘆息久此地名花到處有東自曹州西宋中姚家爲
王魏爲后當年吏部薛西原議禮歸來植數畝從孫鴻臚曰
鳳翔風流遠繼考功後百寶欄前百樣粧樂譜龜茲不離手
珊瑚琪樹珍重深苜蓿葡萄萬里走都人車馬日紛紛未幾
百六遭陽九黃巾十萬下漳河青犢三千圍葛口金堤已決
孤城危豈有豪華鎮相守卽看花榭久成塵曉事花師三兩
人十載中原息戰伐於今再見洛城春余聞此言舉袂起狂
呼欲醉烏皮几花謝花開空復情桑田碧海須臾爾不見開
元全盛時太眞微笑明皇喜舊宮昔有沉香亭壞道哀湍竟

誰是惟餘李白清平詞禁樂流傳教坊伎我聞歐公作守時
曾因風土成花史千載安知單父名百年尙說熙寧始掀髯
絕倒爲君歌手持玉觴朱顏醜乞君十幅葡萄錦紀君樂事
當如何赤烏西走玉兔起錦屏春色將蹉跎蘭亭金谷有時
歇季倫逸少豈復多年年渦岸芳菲樹曾有徐郎攬轡過
義僕行并序韓城爲福建守備時耿藩叛逼降之武不從逆因假謀者言韓氏家且族武不疑乃爲逆劫命
浙督李公患之執織子晉爲質令以計歸其父蒼頭苑亮慨然納書於履行至閩爲邏者所獲抵城壁遺履而去城收履得書知家無恙乘夜策馬北走及追至我兵嚴陣待戰迫者返而亮已就烹矣義哉此僕歌以表之

方修齡

瀟州家世本清高學書學劍學龍韜馬稍清談推第一功名

指顧擁旌旄一從丹詔金門下駐節三溪撼海濤廝養苑亮
八尺軀才武誰奇薛與毛俛首給役惟薪水碌碌尋常甘下
曹杜鵑夜啼天津渡海上風煙白日暮羽檄踏碎鼓鼙聲骨
肉兩地莫相顧將軍誓死不從逆那知逆計多詒誤傳來故
國已無家血淚洒向白雲路少卿齟齬受降城滿腔幽憤憑
誰訴金鼓聲壓錢塘江白髮紅顏日徬徨將軍有子方總角
執令還父免殺傷可憐南北死生隔轅門號令嚴如霜賴有
崑崙饒膽智慷慨致身主人事奪臂龍潭寄手書書藏破履
珍緘秘揮手登車馬如龍擊筑高歌起悲風紅日光催白虹
死就縛遺履眞豪雄將軍得書淚如雨國恩浩蕩足千古爲

項爲劉勝負分肝腦肯爲重瞳努夜深飛馬渡嚴關北風颭
颭愴愁顏回首遙望追兵急我師接救歸家山父子相逢如
夢寐壯士一去不復還含笑解衣入鼎鑊流膏滿地吐花斑
將軍歸來棲金谷銀燭高燒錦圍簇風雨瀟瀟天柱峯隱隱
如聞冤鬼哭我勸爾鬼不須悲大義炳如日月垂男兒不作
身後名年如老彭亦奚爲

上巳登譙樓

張昊

襖飲風流孰與齊麗譙雄覽酒人迷梁園詞賦千金重楚國
山河一望低行樂幾曾過柳市卜居誰爲買花溪春風羽翼
如乘便故里聽鶯北固西

東臺秋望

余光祖

蕭闕偶自一登臺滿眼離愁四望開路指西川遙劍閣雲瞻
北闕近蓬萊黃花晚節高人楊紅葉秋風旅客杯詩債遊情
銷寂寞籃輿不爲訪僧來

譙樓

蔡必達

長看明月照譙樓誰起譙樓對月幽古塚蕭涼埋霸業秋花
慘淡見荒邱數聲鼓角當年壯滿耳蟲螿此夜愁不信變遷
抔土盡生前父子薄封侯

譙邑早發

甯世標

阜陽人

啟戶三星照征衣帶路行蘋洲幾雁過柳岸一鴉鳴漸隱霜

橋月徐聞野佃耕鬢毛風雪裏萍梗愧吾生

題王氏三世節孝詩集

謝溶生

兩間節烈本同途男則從君女從夫夫亡守義以從子其間
味苦如茹荼况乃三世勵霜冰壺範芳徽相繼承婉婉柔則
昭彤管皎皎矢志同淒淒悲夫黃鵠之早寡青箱一綫傳風
雅和熊晝荻維有年服官猶見封遺鮮一麾出守分虎符道
遠艱難奉板輿我朝孝治許乞改濱州五馬迴干旛人臣忠
順皆有本孝思不匱其來遠德門淑行集羣言穆如清風過
蘭畹我為賢母濡霜毫歌以永言筆不輟誰云弱草棲輕塵
直是孤松挺奇節

彭啟豐

傳家江左舊烏衣僚慄秋風冷素帷荻管寒灰供畫字書窗
燈火照鳴機神淵已見丹虬躍華屋仍看紫燕飛棹楔高懸
逢

聖壽 九重璇榜荷恩輝

蔣日綸

彤管誰頻記名高遇亦窮偏憐三世節獨著一門中冰雪存
家範風霜屬化工玉成知有意未許怨蒼穹
修德應餘慶茹荼已迨今撫孤原大節食報豈初心刺史聲
名美 皇仁錫類深庭闈多樂事白髮對華簪

孫士毅

名家龍虎江東最衍澤還從母德論案上絃傳湘女怨機邊
燈映菽書痕况聞苦節綿三世每見 恩褒下九閭如此清
徽照彤史千秋風義在高門

沈德潛

南極瑤光燦堂開錦幌懸丸熊勤丙夜挽鹿憶丁年勁節輝
彤管冰心映綺筵忻看庭玉樹應頌孟陶賢
漢胄儲坤範昭昭行可坊 楓宸頒鳳詔萊綵著龍驤觴進
蓬壺酒人歌介壽章延綿徵鶴算弈世煥榮光

謝 墉

風吹松柏影參差譙國城南棹楔垂欲識陶嬰黃鵠怨一家
夜杼照冰池

霜蒸月冷汗書青二代慈雲貫日星漫道冰肝常自苦黃封
疊疊下 彤庭

葉佩蓀

烏衣舊德至今存巾幗還教大義散辛苦百年三節婦零丁
四世一曾孫紹衣重煥青箱學命服新承 紫誥恩他日
彤輝光史冊知從晚歲表霜根

孫維龍

謝聲振守戎招看牡丹
信是人間第一香不分歐瑋共姚黃曉來著屐憑朱檻晚更

移樽出小堂標格從今推謝客風流何處覓王郎遲稼亭刺史不至

酒酣為取金鈴護羸得濃芬夜染裳
一片紅瑜做繡屏舞裙搖珮鬪娉婷新粧可及朝雲好艷曲
還和夜雨聽名士由來多翰藻將軍不愧有園亭更期消息
傳婪尾乘興重過倒玉瓶

城東看芍藥疊前韻二首
孫維龍

合德初分阿姊香宮衣爭訝嬌鵝黃玉盤孟供南禪寺金帶
圍宜畫錦堂不語半因呼近侍有情常許伴仙郎可憐廿四
橋邊種珍重朱欄護繡裳

誰借天公五色屏朱朱白白闕娉婷不辭籍草風前坐最好

調笙月下聽對酒幾回吟短髻將離莫更演長亭從今添得
牽情處名士名花醉玉瓶

譙陽得代適奉計薦入都作此留別士民兼以誌感四首

孫維龍

一年報政竟如何不信庭真雀可羅自是吏民憐我拙敢言
風雨得天和春陰低覆池邊草夜月初生柳外波炷盡爐煙
無好句使君誰說最能歌

幾日山頭別鳳皇暫來青綬縮銀章何曾明月同西堯雅有
名花似洛陽漠漠烟蕪尋柱史森森檜柏拜湯王持杯便欲
澆千古肯負官家壓酒囊

馬蹄萬斛破飛塵踏遍江南十度春採藥蓮峯空有路觀魚
濠水更何人百城但許書爭富一事堪誇客賀貧漸覺中年
哀樂異不禁秋思起青蘋

琴鶴蕭然不滿車許遊京洛興偏賒九重恩澤真如海一

路風光恰到家衣上酒痕仍故我亭邊別泪隔殘霞他時父

老重相見應爲樊川感鬢華

冬夜過趙旗屯題壁

鄭交泰

三冬寒徹骨雨過趙旗屯月色籠蕭寺燈光接遠村年豐民
樂土夜靜馬嘶門勞頓何爲者捫心只自存

輓張烈女詩

鄭交泰

忠孝節義人之紀不分巾幗與男子渦水鍾靈潔更瑩烈女

盡出清河氏清河有女性端莊雅耽書史曉綱常笄年許字

吳家季變婉常依硯席旁今年吳子邁沉疾烈女脉脉意如

失夏五中旬凶聞至秘之不合深閨悉深閨寂寂鍼停線慧

性靈心知有變欲慰而公闕不言日晡依然歡進饌家人伺

之意少緩更深罷僊各息偃從容就義不聞聲曉日三竿肩

尚鍵三竿未起舉家驚排戶視之玉練橫倉皇解纆一紙墜

淋漓墨瀋猶鮮明行行無別語但樂從夫去念父兼憶姊縷

縷有端緒我聞此邦有木蘭跨馬橫郭常獨處又聞曹家文

叔妻割鼻截耳志不沮皎如日月清如冰千秋女範人共稱

慷慨誰能拚一死一朝決絕丰稜稜含笑向泉臺身死名不
灰鬼神爲之泣行路聞之哀况我奉職守此土表揚風化思
小補親見遺詞竦然立大義千鈞繫一縷嗚呼烈哉從來揭
地掀天業精貫金石一念決金猶有時銷石猶有時折至情
至性之所流千古綿綿永不滅或投智井甘於飴或剪皮金
凜於雪古今烈女同一轍吁嗟乎古今烈女同一轍

信宿亳州

朱珪

行役苦身勞客居心未逸我來穎亳間鄰戒宜克詰周爰布
天膏均施慰箕畢重華有疇咨萬井幸清謐譙疆錯宋穎
司牧保障質艱難知民依即可靜狘裔宿留耻素餐行行問

蕪銓

出亳州北門入西門小憩鳳頭邨看牡丹 朱珪

憑軒諏俗渡清渦隱軫郊廛萬戶多隴麥因風吹浪碧園葩
映日醉顏醅接離不比山公興緩帶相看叔子過桴鼓聲稀
鈴索靜剪與茂對樂婆娑

希夷故里

李廷儀

希夷本大依頗似虬髯公不作扶餘王乃成初九龍對言皆
藥石鼯睡任愚蒙華嶽峻嶒頂松濤謾謾風

嘉慶元年臘月隨朱石君中丞查賑至亳州義門集中丞以
詩見示依韻奉和

李廷儀

安民昔稱元道州力拊凋瘵平虔劉當時大吏苦掣肘動如
 牛首迴山邱尙書慈惠本至性調劑萬物無全牛欽承德意
 庶司責幾人作宰如中牟其知日月不遺照誰同江漢分清
 流自慙故吏拙且陋公不鄙棄翻諮謀廿年離合心惟一山
 川萬里何阻修重來皖江庶有豸承乏下邑敢無鳩饑鴻噉
 噉滿鳳泗下車亟爲蒼生憂執鞭從公霈膏澤窮鄉夜靜聞
 歌謳宵人毫界懼官誘凜如積雪明荒溝詩成雅頌出非望
 萬口流播歡聲稠

芍藥

蘇陽芍藥最盛花時論擔而售計十錢可得百餘朵

周光鄰

十錢百朵爲花愁半作詩籌半酒籌小院午晴春味足似從

香國夢揚州

麗人綽約想丰姿淡抹濃粧總入時待寫有情含淚句自嫌
 不似女郎詩

過淝河

周光鄰

淝流清見底急雨漲沙痕客路濠梁外人家野水村戲魚衝
 岸躍歸鴨到門喧百戰英雄地東風氣欲吞
 譙中九日李石帆刺史招同潘蘭如孫吟秋讌集五馬溝

張葆光

涿州人

故人邨居疎晤語重九相邀具雞黍郊原雨後無浮埃復值
 天涯素心侶渡河一帶殊風光依林傍水穿邨莊天影四垂

樹如薺風吹人語秋空涼木葉微脫潦水盡野人離落殘花
 黃平原莽莽霜風肅野水如刀截寒綠振衣底用矜崇山曠
 望高原豁心目劇談嘯詠襟懷開為君滿引茱萸杯使君旌
 旂照雲日久駐不免勞輿臺今宵月色定復好橋西分手仍
 徘徊馬首蒼涼日西墜征鳥勵疾賓鴻至隻臺梵宇落霞閒
 一線渦流走烟際頻年佳節恒蹉跎明年此會當如何
 正月十五夜石帆先生招同潘蘭如凌謙齋登薛家閣

張葆光

高臺霜氣滿月上野風清遠客流光裏悠然此夜情疏星隔
 林影虛籟入春聲今歲譙民樂村村燈火明

譙中芍藥

張葆光

平居蒔紅藥數朶表春餘茲土花殊絕連畦錦不如新英羅
 几畔幽氣散窗虛老圃亦何愛端因勝種蔬

張園牡丹盛開李敬堂招同諸君讌集

張葆光

譙國名花世所稀由來佳種滿柴扉萬枝濃艷人爭愛一徑
 清風露未晞天上雲霞借顏色山中蘭蕙避芳菲洛陽曾誦
 名園記惆悵林亭昔已非

同潘蘭如凌謙齋遊白衣菴

張葆光

極目郊原春意回雪消精舍絕纖埃天涯好友幾相晤籬外
 寒花半欲開觀化何須窮夢境謙齋得異夢以問灼暗和尚談禪最易露

詩才祇應庭際菴摩樹曾見山僧轉世來謂菴有晉僧修菴未成轉世生山西

富家復來修菴

同蘭如登亳城上奎星閣

張葆光

不辭老病躡危梯傑閣孤標今始躋極日青蒼辨秦楚凌風

笑語接雲霓長堤遠樹行人少落日平湖飛鳥低朗詠四愁

同徙倚春風此際各東西

譙西城樓

潘瑛懷舊人

軟塵如夢接天低沙草茸茸碧未齊怪道青山無著處黃河

口隔一層堤

千里平原掌上看每臨樓閣當登山碧雲萬樹斜陽外春在

河聲嶽色間

李石帆刺史招同王含谿太守裴立齋刺史張竹軒明經晏

集鳳頭村看牡丹

潘瑛

黃塵百尺朝如暮顛風欲斷譙西路譙西地近古洛陽名園

三月多名芳歐公品花此第一丹州延州非匹敵晉家全盛

三十年紅雲蔽地杳薰天當時朝士勝游賞二十四友誰能

賢平泉遺蹟空文藻落日西園愁茂草雲烟變滅幾千春花

落人歸迹如掃我來作客梁園開花前執筆隨鄒枚黃河如

絲不可見此地空餘魏武臺建安諸子才如海今古遙遙不

相待綠珠樓下花如雲今日千枝萬枝在百年幾見春如許

上客難逢花欲語花心似感別離多馬首空香淡容與
奉和朱石君尙書亳州書懷韻

潘瑛

客鳥將雛暫托林漫天風雨亦關心中原勢接江淮近大野
雲盤嵩洛深上將籌邊勞信宿老臣憂國獨沉吟悲涼莽莽
曹公地新種甘棠萬樹陰

同張竹軒江一峯游護城庵看花

潘瑛

日夕澄遠陰春寒慘徒侶驚飈振芳樹雜香散如雨遙望古
柏林蒼蒼覆琳宇荒塗曠人跡虛廊聚禽語園花發故枝雲
堂更昔主久客多悲懷俯仰慨今古

嘉慶元年元夕同石帆先生游自在園玩月

潘瑛

今宵澗水月倚樹兩人看野氣浮天動河光裂地寒風清孤
析遠語罷大星殘歸騎穿燈市春光滿繡鞍

譙中九日讌集五馬溝同石帆先生竹軒吟秋

潘瑛

平原莽蕩風蕭蕭馬蹄一蹴塵埃高目力竭處天在地搖鞭
直欲干青霄乃知障礙隨處有空花亂落雲煙厚微塵一點
何卑高日月星辰傍地走若論地上卽青天此身已是人中
仙回看嵩嶽一拳石萬古冷落洪河邊我曹心空視平等偶
逢佳日幽懷騁且喜天涯多故人莫嫌地僻無奇境是日天
淨秋陽驕中原秋色何寥寥遠林落葉疾于鳥荒溝古水光

如刀茅堂酌酒高興發瓜藤委地寒花飄野人牆頭顧且笑
似嫌樸陋相譏嘲狂言驚眾霍然起新月當門瀉空水醉中
騎馬似乘船草露搖光動青海燈火遙遙出市頭城烏驚起
噪飛樓去年獨對黃花臥愁見涼雲空外流

譙中暑雨呈石帆先生

潘瑛

譙中苦寒復苦熱風高土燥塵飛揚羈旅三年厭昏濁夜夢
江水歌滄浪豈聞一雨過十日天地暝晦羲娥藏流雲委地
洗眾綠耳目颯爽心清涼事當快意患每伏川途潰溢無康
莊繚垣崩卸象山壞性命呼噏愁垂堂兒啼婦嘆卧不得老
屋多漏頻移床東鄰西鄰坐相望安用鑿壁分燈光朝來炎

曦忽復出照爍積潦如沸湯沙土濕蟄育蟲蟻熏烝惡臭腹
肯傷夕貪風露坐爛漫溲蹄破碎含星芒是時黍稷方在地
低處漂沒憂空倉王師破賊馬汗血火雲千里屯荆襄耕夫
憂勞戰士苦雨淋日炙肌膚瘡我曹晏坐弄文史怨咨不樂
甯非狂先生守土重防禦冒犯暑濕巡邊疆文書如山判揮
汗不得少閒吟篇章佇看金氣消肅殺收歛熒惑除櫬槍農
家積穀尙滿囷縱不秋斂猶豐穰長官清貧民氣樂畫閣燕
寢凝清香念此心開百憂解如登華嶽凌蒼蒼同居張子苦
局促謂竹軒經月不食牛鳴腸腦脂蓋眼坐昏黑頭風吹雨行
踉蹌何時拉向渦水北青天皎月傾千觴涼飈吹襟命奏伎

重慶雅樂調笙簧

十二月立春後一日大風雪同石帆刺史竹軒吟秋作

潘瑛

春雲釀雨風怒爭以刀剪水雲無聲微陽薄陰力不敵失勢
一落崑山傾郊原黯黯城郭暗屋山朗朗軒窗明土膏不動
泉脈固昭蘇有意難為興今年上巳雪未已蹂躪殘春萬花
死如何臘盡星初回更逞寒威當歲始一日二日天無顏千
里萬里冰如山馬蹄欲脫人指落西南戰士何時還譙中年
豐婦子樂寒燠雖愆未為虐丈夫當為天下憂寧以私幸忘
遠謀長官恤民如道州賦詩敷政何優優琴堂燈火延賓友

愁看飛花大於手白髮天涯幾故人懷鄉惜別同杯酒

謂竹軒吟

秋別有豪情天地寬傷春不為一家寒雪消試望中原氣草

色青回野燒殘

正月十二日登城南奎星樓

潘瑛

高墉傑閣俯譙樓朱鳥當窗豁遠眸四顧何由開積障一身
如夢落中州人烟樹色孤城小鳥語天風落日愁暫倚星辰
共相賞清澗終古向東流

元夕同石帆先生觀音山看月

潘瑛

野曠天逾近樓高月更明誰能當此夜不起憶鄉情星炯春
燈亂城底遠樹平望雲思北闕回首念西征兵甲寒江色風

霜雁斷聲遙憐笳鼓競深惜管絃清同樂嗟蒼赤孤懷仗友
生聯吟官閣下延眺聽鷄鳴

登亳州城樓

潘瑛

城上驚沙卷斷蓬獨臨睥睨瞰高空英雄寂寞中原氣雲樹
蒼茫大國風背郭夕陽明野水極天寒霧隱邊烽傷春望遠
誰同感牢落東南幾病翁

譙陽錄別四首

周鶴立

曲渦如帶抱城樓吳豫分強此一州枹鼓忽驚天半響旌麾
旋向雪中收乙丑冬教匪滋擾長大中丞首先
職逆肩雪擒渠州城得保無恙野多奧草難
馴雉農不藏刀競帶牛卑我仔肩何以副勉從前席代持籌

撫字催科愧未遑民間寧敢憚官忙春風勸饁花千畝夜漏
治書燭兩行自問術疎爲政拙端期物愛厥心臧思將十戶
中人賦種滿嘉禾樹滿桑

欲呼龍蟄起潛鱗祈望勞勞乞水濱小草只知心向日大君
有詔澤如春自春徂夏四月不雨
大吏入奏得緩征雲堆隴麥猶含秀露湛園

蔬足瞻貧贏得杖鳩諸父老提壺聲裏樂吹豳春轉頗甚
秋穰轉豐

簌簌槐花滿路香柳湖珍重舊書堂何人克奉傳經席卽地
堪成選佛場屈指星霜踰卅拾關心風雨又重陽辛卯後無
登第者

勝因未了文峯塔要仗慈雲護頂光南關有塔未修似於科
名少利嘗與紳士議及

之謹以待
夫來者

亳州公館牡丹甚茂為賦二絕

陶澍

胭脂一抹晚春天國色園中尙宛然吟到斷腸朱十句譙都
花比洛陽妍

漿花新法貽來好接葉移根漫許同種徧江南吾有意倩傳
消息到東風

譙陽觀牡丹歌并序

任硯香公子邀同陳晚香宋一韓金瑟儀戴小麓諸君由孟園何園至李園遍

觀牡丹即席賦此

劉開桐城人

牡丹時節風先催春寒壓我黃金杯花神鄭重故修飾欲吐
未吐心遲回作詩連日陳花臺忽然萬朵雲霞來小黃主人
惜芳質隔年早訂看花日今晨興至破愁來春事已到十之

七去花半里先聞芳花氣如絲透出牆人來百步花似覺側
身低面迎路旁滿懷春思不暇訴眼饑一見驚欲狂飽餐秀
色沾濃香乍到已使春風忙羣芳胡為齊嚴妝天然淺碧裁
衣裳猩紅一點都難藏花雖不語人斷腸曉來嬌不勝酒力
露氣襲人人故立漫言四海求傾城到此翻教迷五色一層
紫霧一層霞幾團粉雪如楊花中有絳綃人獨處綠雲隱隱
臨窗紗渦曲繁華此第一紅玉為田香作室貴超百卉偏多
情艷到十分嬌有骨人間何物比風流大真容貌謫仙筆我
今賞花須盡歡枝上齊張瑪瑙盤酒酣花亦覺無賴可憐欲
倚無闌干迴姿送影愁百端暖香熱艷支春寒對儂欲前忽

又背含情思解雕玉珮偶然作態思紛紛人前揭起鬱金裙
東風搖蕩不自主繡屏無故飛朝雲此時人心趁花意痛飲
譙陽成盛事三千粉黛會名園十萬胭脂散平地種開香國
春正長出地便成雲錦章如此方可居花王花宮仙子皆同
行並肩一色無低昂使我四顧生輝光天香有種何處得我
欲移植求東皇急喚花奴命花史睡到花前莫扶起千里來
遊原爲此色地香天人醉矣富貴從來誇絕倫誰識芳心冷
耐貧不是早時甘寂寞安能艷盛高陽春勝地相逢一樽酒
名花國士遇非偶揮毫願借生春手容華思共洛陽爭絕代
千秋有定評請看今日留題後江北中原誰盛名

牡丹後歌

任靈峯刺史同會亦如司馬陳晚香金瑟儀諸君并率硯香昆季齊至城西十八里鋪之李氏園觀

牡丹儼若主人設晏竟日卽席賦贈

劉開

出郭尋春二十里看遍新綠到紅紫牡丹酣酒未曾醒一時
客至忽驚起東風有意助春工吹得名花艷如此我昨痛飲
城東邊名園遊遍春可憐花枝亦解鬪顏色要與詩句爭鮮
研今日侵晨來勝地東君一一先位置好花留待使君至使
君惜花如惜人一枝一葉皆陽春使君愛花如愛士不取尋
常桃與李護取人間第一香名超百卉冠花史微雨初晴天
更和看花一刻休空過徑叩花園謁花主壁上彩雲欲飛舞
芳心對我願全吐人到有情花似語主人雅性宜林泉富貴

能與花為緣琉璃布地香到天四面紅霞鋪作錦千羣紫玉
種成田嬌姿絕色誰先後太濃轉費春消受藕絲衫子元玉
裳謂藕色墨色兩種皆他國所無者服飾不麗生奇光中有一朶面徑尺領
袖羣花稱貴客意態端嚴自矜惜不肯塗脂作芳澤阿嬌矜
貴飛燕輕漢宮春色描難成楊家姊妹各如玉宮樣新妝盛
結束五家艷隊一齊出紛披珠翠爛雲日一日之內變態新
花房乍啟春橫陳此花本不耐斜照全憑曉露為精神好鳥
聲聲催進酒風來花亦為低首人影與花相左右主人宴客
情何厚繁華滿眼春在手此會此花同不朽遙天欲暮烟靄
生惜別花前無限情

偕陳丈晚香任硯香至城東觀芍藥復作長歌 劉 開

小黃城外芍藥花十里五里生朝霞花前花後皆人家家家
種花如桑麻紅紫為田綠為圃一痕草色低難遮龍眠詞客
游江北一見芍藥如舊識瓶水奉花過珍惜日日讀書坐花
側彩毫拂艷花如生枝枝不覺動顏色今來看花渦水濱花
亦作態如相親牡丹開遍絕代少天教此花為替人紅綃百
幅鋪滿地香絲牽客太多事盤龍戲綵何續紛猷如爐火燒
晴雲三十一品皆瑰質安能齊向坐前出忽然一對紫妃來
此是化工得意筆其餘朶朶俱修飾金帶圍腰豈難覓看花
作相代有人畢竟誰如韓魏國花聞此言亦嘆息對我欲前

覺羞澁凝睇屬意辭不得風光如錦足破寂東君去後春猶
留花神竟有回天力笑我無言面花立索句苦爲花催逼到
此春懷不能抑若將此花作傾城更比牡丹多丰情臨風搖
曳如送迎若將此花作良藥兒女春容免蕭索可憐醫病不
醫愁那管人間有沈約此花功效何必論遭遇當年不淪落
君不見香山居士草詔來詞頭封罷花口開又不見元九題
詩在花葉珊瑚風漾紅千疊自古芍藥推廣陵好花隨地爲
廢興朱旛錦檻感盛事煙絲霧縠圍層層此地芍藥空自好
種花人多惜花少花多轉不如芳草鬢殘香色但留根唯恐
花時折不早携來杖頭三百錢煥得名花枝滿干如此好景

輕送卻可知長日方如年把酒問花花不語園中瓶內意何
許廣陵明月小黃烟花事一般費辛苦我爲花歌花起舞但
乞好風爲作主貴賤兩地各殊時仙姿窈窕無參差濃陰擁
護天如幙闕盡繁華春不知

亳州懷古五首

劉開

睢陽北望總沙塵咫尺梁王迹已陳渦曲園林天亦雪乾谿
雲物楚餘春戎車中夏爭雄志野塊君王獨臥身一死相從
唯二女細腰空瘦舊宮人

龍鳳溝開水變更白零湖畔路縱橫伐燕在駐桓温馬破賊
曾勞祖逖兵南國籌謀虛建業中原恢復始譙城渡江擊楫

悲風至部曲同增慷慨情

蓬坡遺址剩苔斑攬勝天寒鳥自閒鹿邑西來猶是水雉河
東走向無山希夷里宅猜疑內炎帝衣冠杳渺間聞說咸平
琳宇盛謂咸平寺雪中指點到禪關

天書下降自真宗憶昔鑾輿向亳中輦路橫連烟水白羽旗
飛捲夕陽紅元元謁罷春長住俎豆興衰運不同只有朝真
門上月殷勤猶照太清宮

牡丹時節鬪繁華十畝香風送客車不分洛陽稱國色最難
江北有名花我來未值三春景地好能栽萬朶霞舊日支園
擅佳種天香今竟屬誰家

謁老子祠三首

劉開

彫殘碧瓦氣高寒誰向琳宮築淨壇終古白雲纏故里至今
紫氣尚長安人間寥落今祠宇柱下棲遲舊史官辛苦五千
元妙字羽徒更覓解人難

紫府丹青任所之青牛當日亦逢時人生苦縣仙成易世有
春臺我上遲道大不嫌爲帝祖情多猶記送先師元都宗旨
南華備豈獨關門令尹知

鴻荒舊事付雲煙急雨飄風閱歲年天上三清名最貴域中
四大道應先治傳黃老開文帝傳並申韓誤史遷仙李蟠根
靈跡在祥氛彷彿廟門前

湯陵有懷四首

劉開

中原猶是舊邦畿千里人烟事已非今日白狼無處覓當年
元鳥竟誰飛荒郊零雨寒松柏片土西山剩蕨薇可惜墨胎
賢世子忠魂曾否認東歸

陵寢淒涼碧草蕪我來憑吊獨歎歎千秋玉馬悲元子九有
河山怨獨夫寥落餘民周下邑消沉霸業宋遺墟可知尼父
猶殷裔如此家風曠古無

赫濯聲靈自九垓武丁繼起展雲雷君王不語非無故天帝
關心乃薦才版築功名因夢得鹽梅輔相自圖來中興事業
神孫擅莘野風雲亦草萊

故土曾傳太邑商莊山鑄幣亦倉皇天災七載人無恙河患
頻年史未詳不信圯流多豫壤尙欣水勢減陶唐盤庚作誥
權宜策蕩析流民事可傷

魏武帝故宅

劉開

譙東精舍沒蒼苔射獵冬春亦壯哉亂世紛紜誰識主奸雄
猜忌尙憐才成功天限三分局饗士風生八角臺知己舊推
喬太尉墓門祭罷淚猶哀

咏綠牡丹七首

劉開

尋芳疑到翠微宮說是繁華景不同如此名花比傾國題詩
合用碧紗籠

嬌姿欲語思無端淺碧烟浮護曉寒富貴生來無別樣任君
花葉一般看

到是開遲轉占春枝頭色奪柳條新姚黃魏紫皆同輩莫認
青衣豚裏人

休誇天上碧桃花品貴端推鄭國家本是沉香亭畔種任他
草色妬天涯

窗紗半面襯花鮮得遇青蓮亦有緣看到天香新吐後汝南
碧玉正芳年

青瑤作色露爲香擬向花神奏綠章可是朝來酣酒慣鬢雲
繚繞未濃妝

相逢恍惚向瑤臺花亦垂青似愛才國色人間如有價綠珠
一斛買春來

城東口占

劉開

黃初人物憶譙東文采銷沉霸業空春草斷痕碑碣盡斜陽
移照梵王宮

咏芍藥

劉開

牡丹零落信銷沉染翰重爲芍藥吟一樣新妝同國色初逢
嬌客訴詩心春歸轉覺繁華勝花好無如別思深惱恨將離
名最早累人持贈到而今

鼠姑自昔重西京出格風流合屬卿對景艷驚韓吏部當階

紅認謝宣城飽含濃露猶無語乍脫宮衣亦有情銀燭齊燒
看未畢爲花宛轉坐深更

絕好容華極盛年宴游休說廣陵筵名花不惜陽春重色界
眞開大夏先金帶當時占宰相玉盤此日獻諸天作和亦有
調羹用肯讓鹽梅獨擅前

冶艷難禁此數枝琉璃葉上未題辭殿春莫問容肥瘦作后
何論嫁早遲香品曾登騷客賦芳名卻誤鄭風詩譙陽自古
英雄地絕色如何盛一時

依然錦繡護雲烟多少餘春慰杜鵑富貴送完前度客清和
留住有情天嬌能耐久纔堪重艷不全豐轉覺鮮豈是開遲

心愛懶由來絕代自矜憐

丁巳冬杪攜眷將赴臨清賦此書懷卽以留別 汪昌善

敢比高飛鶴不羣宦途蹤迹等浮雲垢衣生蘇蘇司業坐客
無羶鄭廣文索笑愛看花半吐遺愁強對酒微醺蓴羨鱸膾
家何在孤負秋風瑟瑟聞

居不嫌貧苜蓿香一官老遇寇披猖可憐萬卷成灰燼猶幸

全家脫虎狼孟敏達觀曾墮甌盧生大夢正炊梁何辜多難

年逢丙去歲丙辰先慈棄養又丙子病故泣血哀哀又悼亡

蝴蝶階前寸草薇春寒誰與護生機琴幽難得新絃續巢破
空餘小燕飛解任官如僧退院憐兒父學母縫衣私懷欲問

林和靖聘得梅妻是也非

鄉關迢遞隔烽煙匏繫譙陽十五年余自道光壬寅年冬蒞任豈有壯心

盤戰馬並無清福枕流泉苔岑契合難分手書劍飄零易上

肩此去離懷何處寫鯉魚風起雁橫天

渦水謠

黃基

巫支祈巫支祈號稱水母初何知下民昏墊會無恤普天汎

濫徒爾爲因宜幽繫龜山郵巫支祈巫支祈繫爾猶覺非權

宜過流一線難征權淮海千帆欲到遲大禹功疎在此時

秋夜渦河舟中

馬位武功人

秋盡歸舟急渦河烟水迷月明帆影黑霜冷雁聲低聚散增

新感江山憶舊題不堪衰草岸人在秣陵西

重集李氏園亭

馬位

野色碧無際園林刺眼明小亭臨水坐曲徑踏花行芳樹歇

新雨佳禽鳴晚晴舊遊如昨夢回首七年情

譙城竹枝詞

九十九首
選十五首

詹介堂徽州人

太華峰頭玉井邊希夷高臥最多年經過故里尋仙蹟一曲

清溪鎖碧烟

譙望樓頭月自明空傳畫角有三聲阿瞞創業奸如許那得

鬼孫會守成

曹子建畫角三弄有創
業難守成亦難之語

傳信傳疑豈漫然郭公不改舊編年木蘭何辜成烏有惆悵

荒祠少紙錢木蘭之祠廟故里舊志皆詳載之而鄭志獨刪除何耶

斷碣難尋絕妙辭風流何處吊陳思劇憐宜曰還宜礎千古

貞珉小劫時大饗碑久失鄭志稱毫近地無山取材不易民間利用或白或礎此石之一劫也

靈津渡口恣春遊雲剪輕羅護翠樓西指太平橋外路小桃

花映鄭家洲

洮洮新漲宋塘河雙漿如飛舫艫多夾岸菰蒲依舊綠更無

人唱採蓮歌昔聞宋塘河中荷花數十里因修水利近不復見

社鼓鼕鼕二月時東郊曠望晝初遲慈鴉啼到雲深處翠柏

青松孝婦祠

蒲觴滿座醉希熬競渡應看奪錦標何處棖棖絃索响綵艫

唱過范公橋明流酒俗呼曰希熬

立馬城南省稼臺秋光淡蕩暮烟開天然一幅荆關畫誰向

斜陽打稿來

一抹紅霞散水隈風清月白釣魚臺不留名姓風尤古似怕

桐江物色來東西兩釣魚臺古跡皆不可考

蒸衫煥翠柳毵毵擲菓遺鞭興自酣有客嬉春隨意去訪僧

先過白衣菴

一鞭殘照馬虺隤倦解征鞍戀酒杯野店如何名半箇還留

半箇待誰來

西原風采照譙陵暇日垂簾寫道經白苧單衣人去後春光

不到瑩心亭

曇雲柳影嫩晴天鶯語如憨破曉煙家在霸陵橋畔住可憐
春色自年年

咿咿吹角戍樓閑幾處書聲遠近間剛好望仙橋上月清輝
流照硯池灣

瑞麥行爲郡侯張公壽

吳楚奇

譙民凋瘵無寧宇 帝簡神君膺茲土天燭新驚田刺賢晶
燈舊識中廉苦曲江閣閱競崢嶸五馬雙旌出渭城朱輪花
滿春行煖繡甸風清夜月明但知襦袴歌來晚不道靈蛇羅
萬卷濯錦雄文憶葉濤匡時令績推何琬由來人和足豐年

四野芊芊麥秀濃隴上黃雲瞻萬疊陂中碧浪逐千重忽驚
老穉羣相祝異瑞今朝產嘉穀正值使君初度辰仙籌自此
膺遐福我聞在昔漁陽之麥秀兩歧至今賢守令名垂又聞
扶風一莖稱四穗千秋盛事人爭貴未若此日兆禎祥七岐
一枝碧琳瑯恍似華嶽玉峯齊拱向又如雲中金鳳獨翱翔
芝房寶鼎何足羨明昭嘉慶人稀見我亦凝眸訝異珍稱觴
藉供三多獻不惜星軺煩驛使敬賚奇猷上 天子天顏有
喜褒循良龍章華袞稱雙美早見舟霖列上公還期康阜徧
寰中乃知 帝命來牟日不異堦翻芍藥紅

庚寅紀事八首

李 醕商邱籍

彌望蕭條淚眼昏
千家豈有百家存
倉箱雀鼠奔他國
江海魚龍宅近村
荒野曾無黃犢迹
廢墟猶剩綠波痕
遺黎多半飢寒殓
白骨誰收向墓門

洪波浩漾拍天來
萬里長空祇半開
朱鳥自知無勇力
青驄偏逞不凡才
三年誰足一年穀
十月猶驚二月雷
臘盡水深荇藻遍
原田何處慶每每

枵腹欲留喘息難
一絲不掛體肢殘
曉烟暮雨三杯奠
餒犬飢烏七寸棺
病嫗攜筐洒碧血
破鑄攢火熟青肝
凍魂縮項迎風冷
瘦鬼空腔叫月寒

萍遊偶聚說迤邐
荒歉屢經無此年
鬻產售人空寫券
將兒

入市不論錢
赴流牽挽一家葬
仰藥縱橫八口咽
幸有生離悲永訣
相逢近在九重泉

身無羽翼羨鴻飛
海闊天空擇所依
登涉豈能儲糗糒
構飄零何處采葑菲
鶯遷樂土言言給
鹿走他鄉念念違
哭向荒坵辭祖父
蒸嘗好佑旅人歸

敗草頽椽絕比鄰
哀哀哭響出荆榛
茹荼不選澤中菜
易米難肩市上薪
鬻釜辭家惟四壁
粥餽並日已三旬
轍魚尙作江湖想
傳道開倉祝是真

孔邇賢侯謀坻京
軫艱舊牧駐千旌
風姨助櫓千舟續
雲子充厨萬竈明
辛苦眉攢稽眾口
瘡痍色喜謝重生
堯天幸戴

羣公力當宁無勞慮太平

已嘆鄉邦盡罄懸南金又荷簡才賢唱籌量粟防侵併正簿
傳餐酌後先雪撲馬頭殘漏裏霜凝豹哀早鐘前入春佳氣
心房見賴有誠休兆大田

甥女節婦蔡氏輓詞

許長濤

竒節耀千古巾幗誰獨賢不難耳竟截不難身竟殲所難節
與義從容一身全遠矣吾甥女生性有獨堅笄年嬪黃氏殷
勤井臼前舅姑各怡悅內外無間言方期珠樹鳥百歲偕比
肩昊天胡不吊剛風盡淒然結縉甫三載瑤琴一旦捐柔腸
痛幾絕已拚從九泉俯視無弱息仰瞻有高年曾祖憂如結

舅姑淚成涓念乏仲與叔誰慰在生顏委曲留殘喘黽勉庭
幃間暗拭哭天淚陽爲堂上歡舅年幸未衰尙冀納猶憐皇
天忽垂眷姑遂夢執蘭顧叔方離抱姑復病顛連畜拊勢難
周呱呱情何堪代姑理襁褓佐舅營豆籩痛極難爲泣空自
成嗚咽罄室無斗儲紡績給粥餽俾叔婚而子繼夫嗣復綿
所繼方髻亂叔被玉樓銓伯仲惟一子千鈞一髮懸始志矢
彌固毫不虞迺遭事上期如志鞠幼甯畏艱丸菽思無負機
燈丙夜燃身兼教與養鬢眉對應慚德懋節復苦天相壽自
延子始見頭角思邀旌九天有志尙未逮婆影忽沉淵德厚
不食報言念摧肺肝固知有常理敢謂蒼帝愆閨閣誰矜式

海天自驂鸞豈人猶四時功成遽退遷我欲著其德才薄肖
恐難藏拙默而息芳型懼幽潛勉爲述其畧以備採風觀會
應播諸史懿行終古傳

薛家閣登高

孫元煌

偶逐西風上翠微霜林簇簇掛斜輝逢僧半偈俗緣淨見雁
重陽秋思飛常樂園荒松最老虛糧塚在草空肥不須重下
牛山淚折取黃花冒雨歸

渦水漁歌

孫元煌

渦水春來碧似油家家溪上弄魚舟我來也是求魚者竟日
垂綸不上釣

溪橋流水近城隈處處漁人弄棹來一曲清波齊下網兩頭
閒卻釣魚臺

東二橋頭柳亂招穿魚折得最長條大橋東望人如蟻不識
漁家西二橋

南北東西碧四圍釣船不繫欲何歸無人知我春三月一種
桃花帶雨飛

九日登薛家閣

孫元煌

剩水殘邱草正肥斷碑荒塚昔人非一聲中酒崔黃葉九日
吟詩杜紫薇別後久懸松菊夢重來獨著薛羅衣廿年親故
凋零盡落日西風白雁飛

辛巳秋日作

時河決後俞松榮自江南來

孫元煌

連朝久廢登臨興剝啄柴門有故人堤決兩河休問歲水沉
百畝正輸新平田夜湧桃花浪開市秋開瓠子津試向郊原
高處望西風禾黍倍傷神

聞道驚濤南北分噴沙中塞大河身陽候元自歸青海河伯
何緣罪楚人二頃兢沉田負郭萬家都與水為鄰而今卻憶
秋江上一葉扁舟釣錦鱗

東臺散步因寄蘇虛谷廷煜廣文

孫元煌

散步東臯下迢遙入翠薇疎林鳴墜葉秋水淡斜暉見雁書
何在尋僧杖未歸壁間驚好句吟罷白雲飛

東臺訪正修上人不遇

孫元煌

曾識廬山是舊遊疎林荒渚悵悠悠遠帆帶日如侵岸落葉
隨風欲上樓何處白雲行到晚數聲清磬冷于秋我來無復
攢眉飲輸與蓮花一段愁

金針菜

孫元煌

青條總翠已成林長夏黃花又散金閨裏鴛鴦驚獨繡山中
菘韭結同心宜男草傍薰風擷幼婦詞隨曉露吟采采盈筐
堪寄遠江南江北贈知音

擬陳希夷辭諫議大夫歸華山

孫元煌

鳳闕新辭跨蹇還三峯如削入殘年閒心不變金隄柳歸夢

先依玉井蓮山野何堪官諫議君王猶自問神仙白雲從此
常留住日月池頭一晌眠

二月二日遊李園

孫元煌

青鞋布襪初乘興淺水輕篙放野航隔岸紅深花爛漫入門
青引竹琳瑯晚風若爲催飛蓋新月偏教滯羽觴誰傍玉缸
能不醉歸來携得探春香

長歌贈梁聞山

孫元煌

我聞監車之騎行千里不逢伯樂行不已白汗交流大道傍
昂首視天天茫茫又聞有鳥不鳴亦不飛鳴則人皆驚飛則
冲天與天依人生遇合固有時讀書養氣自爲之吾友聞山

美如玉少年學道鍾山郵再別不垂和氏淚十年獨下都帷
近來白下傳才子江東獨步無其比賦就難辭取酒金書成
價貴洛陽紙意起元龍百尺新高樓直上千青雲呵止獨能
容醉尉長揖不肯拜將軍獨有交情稱耐久跛驢布薦淮南
走悲歌不減吳海村別離生死古人存而今天上得知已鴻
軒鳳舉翩翩起崔氏欣開第一莊烏公喜拔無雙士羨爾明
年覲 翠華長楊五柞賦堪誇駿騰驥隨日御九苞縹緲傍
雲車我愧籓籬無所就駕馬何辭戀棧豆春風憶爾黃金臺
會須一舉絕塵埃

離家歎

乾隆乙巳年
紀災詩七首

吳灝

饑饉古所痛未若今茲傷水旱一時集生計何茫茫牛羊鬻
已盡被體無完裳饑寒死故里不如之他鄉斃斃挈妻子纍
纍負篋筐蕭蕭西北風淒淒大道旁鄉里泣相送欲語摧肝
腸汝既從此去吾生恐不長回頭謝鄰里生死誰能量去者
亦難保留者徒倉皇

鬻婦詞

蕭蕭城邊風拂拂吹白草哀哀別離聲淒淒訴蒼昊借問何
爲者送婦就遠道憶昔娶妻時相期與偕老流離今如茲豈
復望相保吞聲兩決絕臨別心如擣居者能自存勿復傷懷
抱得錢供高堂猶可十日飽

鬻女詞

好花方辭枝零落隨風度嬌鳥初破巢哀啼空繞樹
東婦氣結尙悲訴平生所嬌女飢寒不能顧阿翁遠就食生
死莫知處哀哉惇獨身不能保旦暮所傷良家子離別何倉
遽豈免作婢妾猶可得生路空室風雨寒相悲淚如注畜兒
竟不卒豈忍見兒去聞之爲酸鼻長嘆返余御

哭草根

樹皮既已盡草根如黃金草根有美惡原隰窮披尋草根復
草根入土一何深終日不盈筐霜雪霑衣襟草根復草根味
苦傷人心心苦口更苦氣味還呻吟東家食汝死西家食汝

瘖我欲不汝食腹饑誰能禁猶勝殘同類如彼獸與禽
乞盜詞

四野鬼燐青人鬼同縱橫喧呼一聲起奪門如急兵主人匿
不得列炬刀光明顛倒徧廩困恣意搜箱籩平時或相識當
面忍無情替替一家命從此若爲生捆載不回顧公然持火
行此時呼鄰里鄰里皆無聲

悲公子

華屋不值錢良田不產穀典鬻豈顧惜欲售將誰屬不能決
死生行乞緣路曲見人拙言詞低首自瑟縮瑟縮者何爲飢
寒豈爾獨昔人膏梁子今皆無半菽寥寥炊烟遠荒荒寒日

蹙平生所珍藏不能易握粟淚盡西北風吞聲向誰哭

悲白骨

戰場多白骨見之使人哀今無烽鏑慘如何亦成堆風銷雨
蝕化爲灰縱有六親見亦猜見亦猜莫之顧燐火高于白楊
樹啾啾鬼哭天未暮

七姑娘并序

類鳳舊俗正月初七請灰七姑問歲
之豐歉往往有驗殆卽紫姑神之類

吳灝

入春初七兒迎娘替娘作眉嫵替娘作衣粧娘來竈前如人
長兒妹行禮兒燒香娘入房整容顏知娘不教男人看兒房
無人娘喜歡兒敬娘謂娘神又愛娘如美婦人兒扶娘行當

騰雲娘著衣嬌且妍吳綾越錦花樣鮮兒未自穿與娘穿娘
不言但拜舞年豐年歉聽娘許兒爲娘擊太平鼓兒欲娘使
兒知兒不自知娘知之兒往夫家當幾時兒留娘娘不住娘
今還向誰家去明年早請當早來莫過我門向別處
大饗堂懷古

孫之媚

信步東臯下渦流清且長蓬蒿滿邱隴墟墓下牛羊四顧無
卷石安知大饗堂昔傳魏王來富貴歸故鄉旌旗蔽原野軍
中歌舞忙父老與六軍歡呼聲何揚遠追三代跡釣臺與岐
陽近附漢二祖湯沐爭輝光立石擅三絕子建暨鍾梁至今
建安歲始知有延康文章信有神故跡久已荒他日受禪文

王郎亦頡頏循名不責實爲幻何講張乃知勢力短僅存獨
文章不見猶龍氏兩廟曲渦傍東西相對出碑碣互低昂葱
蔥鬱檜柏渺靄青雲翔千秋興廢感無語對蒼茫

同彬然梅嶺登薛家閣

奈宗仁

閑憑高閣出風塵且喜年來結構新閣爲李大馬所修好事將軍非
佞佛忘機老衲愛留賓感時自合酌佳句紀事終當念昔人

閣本西原家廟今改名爲觀音山

俯仰流光須鄭重落花如雨又殘春

輓甘愛園夫子二首

名繩典蕪湖人官亳州學正

鄭翠屏

早歲文章客終年諷詠身青雲餘壯志絳帳送殘春學富還
嗟命官微不救貧一杯哀奠處悽絕坐風人

過薛西園故址

胡效愚

西原何處拜冠裳
烟樹樓臺滿夕陽
臣罪至今昭議禮
君恩當日許還鄉
九原知己尋楊左
千古奇文愛老莊
瓜瓞漫傷君子澤
漢家宗社已滄桑

悼亡詩

梁方氏 梁俊業室

竊從箕帚視良人
篤敬溫恭孝友純
天道不綿仁者壽
覆盆無處問來因

鼎鑊難求可奈何
自將白刃止心磨
詩書萬卷吾何用
留取先賢正氣歌

弱草輕塵漫感傷
從夫就子謝高堂
春暉寸草難言報
地厚

天高再世嘗

微生豈不戀庭幃
轉覺鴻毛寄命非
聞說殉夫同殉國
太真

曾碎老萊衣

寄語家園弟與兄
等閑聞變莫相驚
孔仁孟義曾為讀
此事

從容自在行

士家兒女禮應諳
望表求旌反見慙
但願有墳三尺固
不須

褒獎作虛談

悼孤兒并序

兒名鶴字鳴皋生於乾隆己亥九月之壬辰殤於壬寅四月之壬辰雖四歲而實未三週鳴可

兒之生也一月而孤提攜捧負近三載矣每見其天資英銳頗異非常日強日壯益爽益精將謂天道無虧庶幾琴書有託詎意苗而不秀竟墜羊氏金環因悲命也何窮復折謝家寶樹厭生求死百折千磨恨冰蘂之徒餐悵熊魚之俱失刀

纒欲就懼傷白髮之心鼎鑊難求慚寄鴻毛之命父兮母兮胡甯忍予天乎神乎奈此身何噫聲南山之竹而書恨無窮
决東海之波而流悲不盡惟是意深才淺表白無能語拙詞卑形容難盡耳

梁方氏

芸管纔拈淚已傾招魂欲賦賦難成千呼萬喚悲喉澁冀得聞名識母聲

魂兮去矣去何歸能否晨昏膝下依父子親情應未識九原何處訪庭闈

秋水精神海鶴標佳名端合號鳴臯誠知不是他軒物翻恨輕綃繫未牢

穎悟聰明似夙知四齡能誦百言詩可憐永訣彌留語尙有忠臣孝子詞

當轉留之際欲探其吉凶問他日能報劬勞否猶應曰人間好事惟忠孝臣報君恩子報親

良人瞑目無他語善保佳兒重泰山緬想遺言慙失誤九重

泉下見無顏

逢歡遇慶益淒其血迸中心痛欲迷卻羨杜鵑多便適最高

枝上盡情啼

想像形容夢裏看痛深反致夢成難四鄰礎杵三更月直到

天明淚不乾

登亳州城南觀音山

袁誠格 商邱人

年來游興屢添豪攬勝登山快此遭聯步要憑雙足健回頭漸覺一身高危樓映日丹流彩古木搖風翠捲濤歸路重尋增暮色半空塔影落平皋

重陽後二日自家回亭途中作

袁誠格

柳葉纔黃柿葉紅
平林蕭槭撼西風
連天結陣鴉盤野
隨地爲家雁下空
邊塞音稀知戍遠
故鄉秋熟喜年豐
重陽已過無佳節
忍別東籬菊一叢

寓齋落葉

袁誠格

殘燈如豆一庭空
落葉蕭蕭寂歷中
繞樹陰稀深院月
打窗聲急五更風
飄搖難定棲枝鳥
飛墜驚憐冒網蟲
遙憶故園秋色老
滿階如雨下梧桐

贈胡小泉大剛廣文

袁誠格

廣文安定後談吐見風裁
久厠名流座空懷
吏治才新詩常

滿壁退筆已成堆

君能詩且善書

誰訪高人跡翩翩

白鶴來至其家

卽顏其室曰來鶴軒

姻家李光前承先提戎倡修柳湖書院並文昌閣奎星樓次第落成浚湖植柳稱盛事焉爲作長歌紀之 袁誠格

譙陵書院名柳湖文昌閣與奎樓俱辨方占巽文明地建築東南城之隅歲月歷久風雨壞簷折榱崩任頽敗有湖淤淺柳數株何人振衣起百廢輕財好義李摩雲大河南北舊將軍爲集矜佩告司牧淒淒淒敝關人文首倡尤需羣力迨登高一呼眾山應庀材鳩工釀千金二月經始七月竟煥然重新異舊觀宏開藝苑蛟龍蟠粉壁丹楹光照耀廣廈大庇寒

士寒翹首高瞻東之側飛閣流丹分南北犄角斜對鼎峙成
瑞光上映三台色湖中一道巨長隄小橋流水通東西滿湖
荷花紅間白兩岸烟柳綠淒迷我今觀成喜欲舞將軍好文
不好武投戈講藝及此時扶持名教佐鐘鼓多士歡呼慶功
成祀神報賽譜簫笙從此地靈人亦傑鸞翔鳳翥雲霞蒸忝
居講席慚作手聊歌一曲傳永久秉筆大書光緒朝歲在辛
巳月丁酉

亳州李紫佩刺史幕中感懷

王薰天津人

十載蓬飄轉畫輪又逢元禮喜留賓鳥棲茂樹方知樂花植
名園更占春鼓角有時驚夢寐冠裳無命老風塵劇憐磨盾

歸來日猶作青油幕裏人

秋日寄居柳湖書院卽事偶成

王薰

年來世亂莫悲嗟隨處安居樂歲華偶檢殘書先剔蠹閒臨
古帖屢塗鴉消愁只賴三杯酒遣興惟看九月花時事難知
聊避地依棲喜伴釣魚家

湯陵感賦

宗能徵

漫因元鳥紀休祥至德深仁愜素王三面網開應用命六辭
責已盡包荒早從莘野資良弼若爲桐宮著典章陵寢空餘
松柏盛幾回憑弔湖歸藏

道德中宮謁老子像

宗能徵

目爲人中龍偏說神仙侶欲破此疑團莫能明出處黑白原
可分道德有遺緒紫氣自東來與誰傾蓋語

謁華佗祠

宗能徵

回春有術漢何亡志士空懷濟世方醫國其如曹相國千秋
遺恨在青囊

改建孝烈祠落成因賦四絕

隋封尚書贈將軍謚孝烈魏女
木蘭祠舊在東關外里許今卽

梅氏地
改建

宗能徵

萬里從戎志不羣天教雄畧屬釵裙迭膺懋賞揮如土慚愧
君王負厥勲

已許官家百戰身何須寵遇後宮親易名詎足安貞魄辜負

丹心十二春

駿馬雕鞍勝女紅長征竟莫決雌雄古來多少奇男子難及
無雙報施崇

巾幗能移孝作忠辭榮誰解木蘭衷低徊祠畔青青草猶是

幽荒日月間

宗能徵

希夷故里口占

鼾睡非無地經年醒幾時此公詎夢夢我亦仰希夷

宗能徵

衙齋偶吟集唐六首

滿眼文書堆案邊元每當漏永不遑眠崔才微分薄憂何益

杜忽憶閑居思浩然白居易

聽他言志在雲山王建多感流年水不還許無術理人人自理

韓終朝無事更相關姚合

吏才難展用兵時杜荀鶴惟化州民解詠詩白居易本不將心挂

名利李羣玉乖疏還有正人知司空圖

由來惡舌駟難追孟遲不肯回頭問是非陸龜蒙自歎獨為折腰

吏張籍敢蘇鞭裘馬未輕肥薛能

免將心事算浮榮羅邲初得官時髭未生元稹惟覺宦情如水薄

薛能幾人湮沒幾垂名殷堯藩

莫道歸心似轉蓬許渾榮枯盡在是非中功操心未省趨浮俗

韓偓不繫舟隨去住風白居易

聞臺南劉淵亭提戎永福設計禦倭斬俘甚眾克復臺北全

境樂為之歌

宗能徵

君不見諒山一戰法夷驚將軍赫赫有威名又不見赤嵌一

戰倭奴殲海外諸國均破膽起衰振俗具神謀豪氣橫空殊

苦戰胸中憤懣久不平叱咤風雲皆色變浩然一揮魯陽戈

三千子弟同凱歌歌聲鼓聲渾一片炮雷刀雪血成河道旁

鬼骨如山積中原將士盡顏酡誰謂已悞於前不可扼行將

跨海征東滅此朝食之妖魔官家不吝頒殊賜足酬壯士封

侯志犁庭掃穴繫長鯨奮臂莫受黃金餌黃金餌均短氣黑

旗所向不知止赤心為國當無已嗚呼赤心為國當無已



